



黑龍江志稿卷八

經政志

墾丈

墾務沿革

江省墾務沿革約可分爲三時期自康熙二十二年設置將軍以後至咸豐十一年爲屯墾時期自咸豐十一年至光緒三十年爲部分開放時期自光緒三十年以迄今日爲全體開放時期其在第一時期者僅散見於檔籍墾況地數均無可考年代事類亦多不聯屬擇要錄列知其原始而已其在第二第三時期有案可考者則節錄案由俾知原委其有冊案不全地數不確者則記其概畧以俟廣續

一 屯墾期

康熙二十二年十二月郎坦等以羅刹情形具奏上諭據郎坦等奏攻羅刹甚易發兵三千足矣朕意亦以爲然第兵非善事宜暫停攻取設烏拉寧古塔兵一千五百名並置造船艦發紅衣礮鳥槍及教之演習於瓊瑋呼瑪爾二處建立木城與之對壘相機舉行所需軍糧取諸科爾沁十旗錫伯烏拉之官屯約得一萬二千石可支三年且我兵一至卽行耕種不虞匱乏云云此爲議設屯田之始

康熙二十二年命征羅刹之兵在瓊瑋永戍築城屯田先是副都

統薩布素出征羅刹兵至額蘇哩

地在瓊瑋北江東岸距瓊瑋百餘里在俄屯諾瓦巴格之北

里十奏冬令進征運輸維艱今冬可暫駐額蘇哩俟來年四月冰解

進攻廷議允可並令永戍額蘇哩上諭我兵旣命永戍額蘇哩應派烏拉寧古塔兵五六百人達呼爾兵四五百人於來秋回家口發往設將軍副都統協領等官鎮守是否可行令郎坦馳驛前往與薩布蘇確議尋薩布素等覆奏額蘇哩今年七月旣經霜雪烏拉寧古塔家口若來秋遷移恐地寒霜早諸穀不穫難以餬口應於來春就遷移達呼爾兵五百人先赴額蘇哩耕種量其秋收再遷家口以烏拉寧古塔三千餘兵分爲三班將軍副都統等更番統領駐防上諭如薩布素等所奏兵丁額更番必致困苦非長久之道其在瓊瑋建城永戍遣郎中額爾塞與薩布素確議以聞至是薩布素等奏永戍瓊瑋諸務並籌畫屯田築城等事因命薩布素爲鎮守瓊瑋等處將軍雅齊納爲副都統其定議在二十二年

實行屯田在二十三年也

康熙二十三年正月命都統公瓦山與薩布素詳議應否攻取雅克薩城並作何舉行擇其有裨於事者以聞尋公瓦山等會奏我兵來年以水陸並進萬難克取卽毀其田禾以歸上諭薩布素借端延滯事必無成當自京師選賢能大臣一員統兵以行再發盛京兵五百人代黑龍江兵守城種地出征兵還亦令還盛京種地事宜遣戶部大臣一員督理所云羅刹早熟之穀卽內地春麥今我兵亦多種春麥及大麥油麥霜降前皆得收穫則不因師出曠一年田功

康熙二十四年正月戶部奏黑龍江佐領鄂色等言耕牛倒斃已盡農器亦有損壞今時近東作遣理藩部官一員同馬喇如數購

買耕牛送往農器令薩布素等營造預備先是戶部郎中色奇等
於二十三年十月奉命勘視設驛地方自烏拉吉林至瓊瑋計丈
量共一千一百九十五里應設十四驛上諭驛遞關係緊要凡丈
當以五尺爲度今途程太遠令色奇等再往詳加丈量尋覆奏自
烏拉吉林至瓊瑋以五尺細丈共一千三百四十里應設十九驛
上報可令每驛設壯丁並撥什庫三十名馬二十四匹牛三十頭壯
丁自盛京寧古塔所轄各驛柳條邊派出馬牛令盛京戶部照數
採買送往

以上見朔方備乘

按黑龍江外紀內載上下站關防領催二名外每站領催一
名壯丁二十六名惟卜魁站多三名又卜魁站額設馬四十
匹牛三十頭特木德赫至茂興七站每站馬二十六匹塔哈

爾至黑龍江城十二站每站馬二十匹餘茂興等十九站牛二十七頭又稱茂興古魯兩站間有烏蘭諾爾一站係雍正五年將軍富爾丹增設故有新站之稱云云查與朔方備乘所載壯丁牛馬數目不同蓋朔方備乘所載係原定辦法及後實行仍有變更也站官領催皆支薪餉壯丁均耕墾自給此爲開墾站地之始

康熙二十五年特遣部院大臣課索倫達呼爾耕種以郎中博奇

課耕有法禾稼大收奉旨褒美

見黑龍江外紀
盛京通志

康熙二十六年令索倫達呼爾兵耕種墨爾根地方盛京官兵耕

種黑龍江地方由部差官監視

見所抄北
檄案

康熙二十八年上諭據大學士覺羅勒德洪奏羅刹四十年盤踞

之衆數日卽行擊破收復雅克薩城今旣告成功防禦斷不可已
應於何處永駐官兵令依桑阿及郎坦往薩布素處詳加定議以
聞伊桑阿等尋奏臣等遵旨自訥木爾河口至溫察爾屯詳勘山
野空曠多可耕之地其間空郭爾進屯與黑龍江城近應築至駐
防黑龍江之烏刺寧古塔兵五百人及水手人役又駐防訥木爾
兵及家口俱於明春一同啟行築城再勘墨勒根附近處有嫩江
岸之墨勒根屯可以築城俟訥木爾駐防兵收穫田禾一次再往
云云旋經議定在墨勒根築城將軍薩布素駐劄於此命副都統
溫岱納秦駐防黑龍江副都統博鼎築城築城兵丁各再量增夫

役兼令種地

備見朔方乘

按墨勒根卽墨爾根訥木爾河卽訥謨爾河溫察爾卽溫察

拉屯現屬克山縣俗名蒙古大屯空郭爾進卽洪霍爾濟屯
又名洪果爾吉現屬訥河縣皆原有之索倫村落也此條朔
方備乘作二十四年查其事蹟係二十八年

雍正十二年設呼蘭城守尉至乾隆元年添設自茂興至呼蘭六
台每台額設領催一名壯丁十五名牛馬各十頭惟博勒集哈一

台牛係七頭

黑龍江外紀作每台領催一名壯丁九名牛馬各領

催支領薪餉壯丁耕墾自給

呼蘭至巴彥蘇蘇間之新安台係同
治四年設每丁月給錢兩吊未給地

畝

乾隆二年設立呼蘭官莊官莊亦名官屯先是將軍那蘇圖於雍
正十三年奏請在呼蘭地方設立官莊至是照准設立官莊四十
所戶部議覆原摺畧稱黑龍江地方設立官莊令盛京將軍於八

旗戶內選能種地壯丁四百名攜帶家口前往開墾每壯丁一名撥給地六十畝蓋給草房二間每十丁合編一莊共設官莊四十所每十莊設領催一名共設領催四名管理由盛京遷移家口每丁給碾磨銀五兩其家口每人給整備行裝銀二兩沿途各給口糧撥驛站車輛送至吉林由吉林撥運糧船仍給口糧送至呼蘭初至呼蘭每丁給冬夏衣帽其家大口每月給糧二斗四升九合小口半之每開墾地六畝給籽種二斗每莊給牛六頭如有倒斃動支庫儲牛價銀買補再呼蘭安駐兵丁各有墾種地畝不能代官莊人等助墾於每莊額給牛六頭外各多給牛二頭令全出力墾種此牛如有倒斃毋庸補給每牛一頭月給牛料糧一石二斗其家口糧給一年牛料糧兩月皆停每丁所授之地歲納粗細

糧三十石第一年免輸第二年交半第三年全納再委撥官兵採木造屋每間各給飯銀四兩動支庫銀倉糧令該將軍等分折歸款奏銷俟安插官莊事竣令盛京將軍於八旗開戶人內再查有願往呼蘭墾種官地之人應增官兵若干再議具奏是年御史福海奏整理官莊須擇實有地畝力能耕種苦無牛具之人始可借給銀兩准由盛京戶部領銀二萬五千兩分貯齊齊哈爾一萬兩黑龍江七千兩墨爾根五千兩呼蘭三千兩飭各該管官查明無牛具之兵丁酌量借給得旨依議

見所抄北京檔案黑龍江外紀所載額定牛具銀數亦同

乾隆六年增設呼蘭官莊五座擇丁五十名領種七年又議准呼蘭左近溫得亨山及都爾圖地方土性肥饒水草佳美由盛京選壯丁五十名增設官莊五座設領催一名

附六年戶部議覆增設官莊摺 呼蘭地方寬衍可設官莊之處尙多應將前設四十官莊內閒丁一百三十八名選擇五十名增設官莊五所撥地開墾每名給地六十畝及牛種器具糧並每年應納數均照二年之例但應選撥官莊閒丁不比他處移居其每丁應給房二間每間給銀四兩五錢令其自行蓋造毋庸別撥兵丁至餘丁備補各莊空缺

附七年戶部議覆續增官莊摺 呼蘭左近溫德亨山並都爾圖地方土性肥饒水草佳美應將盛京將軍查送願墾官地開戶人內選能種地壯丁五十名增設官莊五所撥地開墾其資送及撥給田房牛種器具衣帽口糧並應納糧數均照二年之例再六年增設官莊五所合之此次所增官莊五所已足十莊

之數亦照例增設領催一名管理

乾隆十年大學士等議覆巡查郎中福明安條奏爲各城壯年閒散早謀生計據稱黑龍江屯莊三十墨爾根屯莊十一齊齊哈爾屯莊二十每屯屯丁十名每名每歲交納細糧三十石是三城已有成效請每年查其所得人數漸次酌立官莊呼蘭千里膏腴可以大興屯田請以奉天開檔之人每年酌立屯莊十餘座議如所奏行

按呼蘭官莊始於乾隆二年前已詳述其他二城官莊未知始於何年茲將議覆奏案及乾隆十年以後添設官莊各案暨舊籍所載附錄於左

乾隆十年六月初二日大學士等議覆巡察黑龍江戶部郎中

福明安條奏內一稱黑龍江等處兵丁生齒日繁現在各城壯年閒散計有五千餘名若不早謀生計將來必至窮乏呼蘭有地可耕請照雍正十三年將奉天開戶旗人移屯呼蘭設立官莊之例酌借賣米銀兩令往耕種分年交米還項等語查乾隆六年酌派在京旗人移屯奉天等處一案經大學士查郎阿查勘除寧古塔所屬拉林阿勒楚喀等處可種地畝外黑龍江所屬齊齊哈爾之東南六百餘里呼蘭地方有地徑五百餘里列爲上等呼蘭之東佛忒喜蘇蘇地方有地徑二百餘里列爲次等經議政王大臣議以拉林阿勒楚喀距船廠甚近請先於該處移駐滿洲一千名屯墾俟有成效由近而遠漸次舉行今該巡察郎中所請亦屬代謀生計之意但閒丁五千餘名較在京

旗人滋生之繁不啻霄壤况各處可墾地畝俟拉林等處由京移駐者屯種有效均須次第舉行自應將呼蘭地方留爲在京旗人墾種外其佛忒喜蘇蘇地方雖列次等而距該處旗人尙不甚遠以之移駐屯墾亦足資生應請交該將軍等查酌撥往并應否仿照官莊之例借給遷移盤費詳議具奏一稱黑龍江屯莊三十墨爾根屯莊十一齊齊哈爾屯莊二十每屯屯丁十名每名歲交租細糧三十倉石是三城已有成效請每年查其所得屯丁人數漸次酌立官莊且呼蘭千里膏腴可以大興屯田請以奉天開檔之人每年酌立屯莊十餘座將見積貯充盈不但接濟黑龍江等三城遠而奉天近而寧古塔俱可接濟卽將來盛京八旗生齒日繁拉林移駐充滿之日并可照例移駐

應如所奏行令該將軍等將黑龍江等三城如何漸次添立官莊并呼蘭每年酌立之處詳細確查定議至稱各城各屯向乏樹木應於設立城池屯莊之處栽種以供薪木梁柱之用應如所請令該將軍等一併酌議具奏

乾隆十一年六月戶部議覆黑龍江將軍傅森疏稱呼蘭左近溫得亨山地土寬廣水草佳美可設官莊請於奉天將軍查送原種地開戶人內能種地之壯丁每十名設官莊一座仍歸舊官莊領催管轄應如所請從之

乾隆十一年十二月戶部議准黑龍江將軍傅森疏稱黑龍江被水官莊三座酌移額爾本河開墾所有蓋造兵房並派兵協墾及分別年限交納錢糧各事宜均照呼蘭添設官莊例辦理

從之

乾隆十六年十二月十九日戶部議准黑龍江將軍富爾丹等疏稱呼蘭城溫德亨山八座官莊地畝疊被水災不堪耕種請移於巴延穆敦郭爾敏穆敦地方從之

乾隆二十五年十二月初六日軍機大臣議准黑龍江將軍綽勒多奏稱派遣回子百名前往呼倫貝爾教導灌田請官給住房並派齊齊哈爾熟悉農事之領催賞給七品頂戴按月支給鹽菜銀兩專司董率五年期滿以驍騎校補用應如所請又奏請撥給農具耕牛查農具應令該將軍酌量買給牛頭請照部議給發百頭每頭發價銀十一兩購買至所稱耕種之人每名令領籽種二石未收穫前准於齊齊哈爾存倉米石內借支口